

# A-čoahkkinprotokolla

RiddoDuottarMuseat

**RDM stivračoahkkin 23.06.20, Teams-čoahkkin 10:00-11:50**

## Čoahkkinoasseváldit:

Johan Vasara	Stivrajođiheadđi
Hilde Skanke	Nubbinjođiheadđin
Sten Magnar Nikodemussen	Stivraláhttu
Marianne Balto	Stivralahttu
Olaug Larsson	Stivralahttu
Ann Britt Eira Sara	Stivralahttu
Elle Bals	Bargiidovddasteaddji
Anne May Olli	Čáli

## li čoahkkimis:

Svein Atle Somby	Stivralahttu
Sissel Gaup	Várrelahttu

Áššenr.      Ášši

**12-2020**      **Čoahkkingohččuma ja áššelisttu dohkkeheapmi**  
*Dohkkehuvvon ovttajienalaččat*

**13-2020**      **Válljet guokte olbmo vuolláičállit protokolla**  
Ellen Bals ja Ann-Britt Eira Sara válljejuvviiga ovttajienalaččat vuolláičállit protokolla.

## 1.            **DIEHTOJUOHKINÁŠŠIT**

### **14-2020**      **Diehtujuohkimat**

- Dán jagi rehketoallu dássáži
- Dáhkádusaid čuovvoleapmi ášši 25-19
- Árbediehtu lávdegoddebargui ođđa áigemearri: 20.11
- Arkiiva digitaliseren
- Guovdageainnu/Álttá ášši referánsajoavku ja dan mandáhtta
- Jođiheadđejoavkku ja hálldahusa mielbargiságastallamiid bohtosat
- SVD divvun/bajásdoallan
- Saga mobilii sirdin

**Mearrádus:** Vuhtiiváldán dáid.

## 2. ČUOVVOLANÁŠŠIT

Eai leat áššit

## 3. MEARRÁDUSÁŠŠIT

Ášši 15-2020

Gulaskuddancealkámuš Sámedikki 2020 museadieđáhussii

1) Áššebáhpirat:

- Sámedikki museapolitihka prinsihpat, sáddejuvvon stivrii 04.06.20

2) Áššečilgehus:

RiddoDuottarMuseaid gulaskuddancealkámuš “Sámedikki museapolitihkalaš prinsihpat” dokumentii.

### [Sávaldagat sámi museaid ovdáneapmái](#)

Dieđáhusas lea ollu mii sámi museaide lea buorre. Sámi museain leat dárbbut mat fertejit gokčojuvvot vai museala doaimma sávahahtti ovdáneapmi ollašuvašii. Oassi dáin dárbbuin bohtet bures ovdan dieđáhusas, dego sámi museaid ekonomalaš dilli ja dat movt dáčča ja sámi museat systemáhtalaččat vealahuvvojit.

### [Musea-doahpaga lea servvodatrollaperspektiivvas dehálaš defineret](#)

Sámediggi čujuha dieđáhusastis IOCM:i, 20. siidui, gos museat definerejuvvot ná: “Musea lea bastevaš ásahus, man vuodđudeapmi ii leat dienas. Dat galgá bálvalit servvodaga ja dan ovdáneami, ja galgá leat rabas gussiide. Musea lea ásahus mii čohkke, vurrkoda/konservere, dutká, gaskkusta ja čájeha sihke materiála ja immateriála áššiid olbmui ja sin birrasiin, dutkama, oahpaheami ja guoimmuheami várás.”

Sámegillii gohčoduvvo musea maid dávvirvuorkán. Diet namma speadjalastá ge justte musea doaimma.

*Det Norske Akademiske ordbok* čilge musea ná: “Báiki, visti (dahje guovlu mas visttit) gos leat ja vurrkoduvvojit álbmogii oaidnin ládje dáidda-, dávvir- dahje visttečoakkáldagat, mat leat kultur- dahje luonduhistorjijálaččat dehálaččat. (naob.no/ordbok/museum neahttačujuhusa definišuvdna jorgaluvvon sámegillii).

Dán dieđáhusas lea dađi bahábut museaid servvodatrolla birra dat oaivil ahte dat leat earenoamážit guoimmuheadjit. Lea unnán daddjon daid dehálaš museala vuodđodoaimmaid birra. Dat han leat justte dát barggut maida gáibiduvvo fágagelbbolašvuhta ja oahppu mii dál ii leat gávdamis Sámis. Diekkár oahppu berrešii álggahuvvot nu jođánit go vejolaš, vai lea vejolaš čađahit daid bargguid maid ferte bargat čoakkáldaga áimmuhuššamis, ja boahttevaš buolvvaide vurrkodit fysalaš luottaid ovddežis. Museaid servvodatrolla defineremis ii sáhte garvit dien.

*Collections are the most important resource of a museum: they are what make museums unique and, without them, the museum would not exist” (Scottish Museums Council, 2005.)*

Dien sitáhta geahččanguovllu lea RDM mañemus jagiid geavahan barggustis, ja lea nu nagodan čađahit rievdademiid, mat leat addán hui buriid bohtosiid. Vuodđoáššin lea ahte mis lea guovddážis sámi servvodat ja dat maid mii musean galgat bargat ávkin sámi servvodahkii. Dat bargu maid mii odne bargat, lea sihkarastit boahttevaš buolvvaide dan árbbi maid mii leat ožžon, ja galggašeimmet maid fievrridit

sidjiide veháš eambo go maid mii ieža oaččuimet. Museadoaimma váimmus ja vuodđogeadgin lea čoakkáldat.

Čoakkáldathálddašemiin sáhtta olahit ollu, dego čájáhusaid (“la elva leve 2017”), erenoamáš ovttasbargoproševttaid («There is No Sami Daidamusea», Dekoloniserejeaddji museadoaimma), iešguđetlágan gaskkustanproševttaid dego VAPPUS digitála oahpistanofelaš ja RDM musea-podcasta, ovttasbarggu nationála ja internationála universitehtabirrasiguin ja eará vel lassin. Buot dát leat čadnon dasa ahte bisuhit čoakkáldaga boahttevaš buolvvaide, váikkuhit nu ahte mii sámi kulturárbbiin leat čeavlát, mii fas nanne eamiálbmot čeavláivuođa; Leat rámis sihke identitehtain ja gullevašvuodain, iežas historjjáin ja iežas kulturárbbiin. Dát addá revitaliserenvejolašvuodaid, ja vejolašvuoda máhcahit masson identitehta ja kulturgullevašvuoda, ávnnaslaš ja ii ávnnaslaš árbbi vehkiin.

### Museaide áigeuovdilis alit oahpahus

Sámegielat leat maid hui dehálaččat museala doibmii, ja vai mis leat fágaolbmot geain maid lea giellamáhttu de fertet mii bargat rekruteremiin sámi servvodagas. Stuora hástalus lea ahte oahput mat leat dárbbášlaččat eai fállujuvvo Davvi-Norggas/Sámis. Dan dihte lea dárbu ásahtit dáid oahpuid omd. Sámi allaskuvlii, geain lea ulbmilin buvttadit dárbbášlaš fágagelbbolašvuoda sámi ásahusaide. Ovttasbargu gaskkal museaid ja oahppoásahusaid lea dárbbášlaš, maiddá dan dihte go museafágalaš hástalusat leat unnán dutkojuvvon. Kurateren, konserveren ja museologiiija leat dehálaš oahpposuorggit lassin eambo árbevirolaš fágaide dego historjái ja arkeologiiijai. Dát leat fágat maid livčče čađahahtti Sámi allaskuvllas jus sii oččoše daid resurssaid maidda lea dárbu.

Lea maid dehálaš ahte museat geavahit árbevirolaš máhtu ja duodjeteknikkaid. Konserveren lea fágasuorgi mas sihke árbevirolaš diehtu (oarjemáilmmi) ja akademalaš dutkanvuđot máhttu geavahuvvo. RDM lea guhkit áiggi oččodan Oslo universitehta ja Sámi allaskuvlla ovttasbargat konserverenoahpu ráhkademiin, mas sámi árbevirolašmáhttu sáhtta geavahuvvot konserverenbarggus dakko gokko lea vejolaš. Dát heive erenoamážit dávvirkonserveremis ja duddjonteknikkaid geavaheamis. Lea hástalus ahte dát lea unnán dutkojuvvon, vaikko dán máhttui livččii dárbu. Ovdamearkka dihte makkár duddjonvuogit dagaše ahte museala dávviriin orgánalaš doajáldat dahkko jođáneappot. Jus museain livčče stipendiáhttavirggit de dát buvttášii dárbbášlaš dutkama.

RDM lea guhka háliidan ásahtit vistesuodjaleami oahpahalliortnega ja mis lei buorre ovttasbargu Kárášjoga sámi joatkkaskuvllain gos mii sin huksenfága ohppiid oahpisteimmet vistesuodjaleami fágii. Mii nagodeimmet boktit beroštumi oahpahallisajiide museain, muhto dasto fuomášeimmet ahte vistesuodjaleami ii leat oahpahalliid oahppomihtun. Dá han lea okta dain ákkain manne leat unnán vistesuodjaleami fágaolbmot, dan dihte go rekruteren ii leat oahpahalliortnega bokte vejolaš. Lea illudahtti ahte Sámediggi oaidná dán hástalus ja áigu geahčadit dán oktan Sámedikki sámi vistesuodjaleami ovddasvástádusain. Dasa lassin berrešii 10. kapihttalis boahit ovdan man hástaleaddji lea oažžut visttiid ja rusttegiid (olgomuseaid) ođasteapmái doarjaga. Sivvan dasa lea go doarjjaortnegat mat gávdnojit eai govčča visttiid mat leat sirdujuvvon áigá museaide. Lea maid dai váttis gávdnat doarjagiid visttiid ja fatnasiid ráhkadeapmái.

### Ovttasbargu mas luohttámuš

RDM ovttasbargá bures sihke sámi, norgga ja internationála museaiguin, ja eará ásahusaiguin ja organisašuvnaiguin. RDM lea ožžon posiitiiva fuomášumi dan dihte. Mii fertet deattuhtit ahte eaktun ovttasbargui lea luohttámuš. Luohttámuš lea juoga maid don fertet duodaštit ahte ánsšášat – ii dušše ávžžuheamis leat ávki.

## Vuorjašupmi

Lea dušše RDM, dan guđa sámi museasiiddain, geat eai oaččo kulturviessodoarjaga (siidu 28). Sámediggi háliida boahhte jagi rájes ovtastit musea- ja kulturviessodoarjagiid daidda geat ožžot goappašat doarjjaortnegis, ja gohčodit dán museadoarjjan. Dát gal lea midjiide vuorjašupmin, muhto ii ekonomiiija dihte – muhto ahte kulturviessodoaibma heajuda museala doaimma, ja buktá vel ain eambbo boasttuáddejumi das ahte mii dat museala doaibma duođai lea ja mii museaid servvodatrolla duođai lea.

Siidduin 5-6, kapihttalis 4.1: “Sámi museaid birra” čállo ahte leat dušše guokte museaovttastumi main ii leat čilgehusas guovddášdefinišuvdna, ja nugo namuhuvvon juo ovdalis de lea RDM áidna gii ii oaččo kulturviessoruhtadeami. RDM doaimmaha museaid, ja vásiha ain duos dás vuordámušaid ahte RDM galggašii buvttadit kulturviessodoaluid. RDM vásiha ahte Sámedikki jahkásaš juolludanreivves ja jahkásaš raporteremis eai leat eavttut mainna árvvoštallet čielga museala doaimma, muhto dan vuodđun leat baicce lágideamit ja man gallis serve lágideamiide. Mii sávašeimmet ahte Norgga kulturráđi čađahan museaárvoštallan rievdadivččii dán, ja nu dagašii ahte maidai Sámedikki raporterenskoviin livčče eambbo museafágalaš árvvoštallamat.

Sámedikki dieđáhusas, siidu 16, bohtá ovdan ahte sámi museain leat vuollel 20 000 kulturhistorjjálaš dávvira ja birrasii 71 000 gova. Dáin leat RDM museain 8711 kulturhistorjjálaš dávvira čoakkáldagas, 24466 gova, 24 fatnasa, ja 33 kulturhistorjjálaš vistti. Dasa lassin máhcahuvvojit 734 Bååstede-dávvira RDM:i, ja RDM hálddaša SVD dáiddahistorjjálaš čoakkáldaga ja Sámedikki dáiddačoakkáldaga, oktiibuot 1300 dáidaga. Dalle sáhtta dadjat ahte RDM:s lea sullii bealli dan dávvirčoakkáldagas man birra mitaluvvo siidus 16.

Dat mii livččii fágalaččat dohkálaš, ja maidai vuoiggaleamos, livččii jus ekonomalaš rámmaid plánen ja museaovdánahttin vuodđuduvvošii maid museaid čoakkáldatsturodagas. Eará ovdamearka lea dalle go ovdanbuktit museahástalusaid Sámediggái, diet áigi berrešii maid leat museaid čoakkáldatsturodaga mielde. RDM:i, mas leat njeallje kulturhistorjjálaš musea ja okta dáiddamagasiidna, juolluduvvo seamma mađe áigi go earáide, váikko vel sis lea mihá unnit museala doaimmá. Mii vásihit ahte dát lea negatiivvalaš, dan dihte go midjiide addo beare unnán áigi mitalit min doaimma birra ja mii fertet rádjet áiggi čoahkkimiin. Dát čájeha ahte ii leat ipmárdus dasa ahte RDM:s lea Sámedikki hálddašanguovllu stuorimus museala doaimma, ja RDM sáhtta hui ollu govssahallat Sámedikki sámi museaid rámmas.

Čoakkáldatdoaimmat mat leat hui áigegáibideaddji, eai leat dakkárat maid hálddašanorgána jearaha, ja min mielas orru ahte museala doibmii ii leat šat beroštupmi. Museain lea erenoamáš servvodatrolla. Mii leat čoakkáldathálddašeadjit, ja justte dát oassi ii báljo oba leat ge oassin dieđáhusa 5. kapihttalis mii lea museaid servvodatrolla birra. Čoakkáldat lea váimmus juohke museala doaimmas (duođai musea váibmu). Museat sáhttet čoakkáldagaiguin áimmahuššat dálááiggi ja vássánaiggi, ja maid boahhteáiggi, narratiiva geahččanguovllu. Museat leat okta dain moatti ásahusain geat beaivválaš barggus barget jahkelogesh perspektiivvas. Museaid museala doaimmaid deháleamos geavaheaddijeovku eai leat vel riegádan dan áiggi go bargu dahkkojuvvo. Ulbmiljoavkku áhku ja ádját eai leat vel riegádan. Čoakkáldagaid lea dehálaš áimmahuššat, dan dihte go mii eat dovdda teknologalaš ovdáneami mii lea 100 jagi geahčen – soaita ahte sii ođđa teknologiiin mii dál ii vel gávdno, sáhttet oážžut dieđuid ja máhtu, maid mii eat dál vel sáhte čoakkáldagain oaidnit.

Museaid rolla lea dan dihte mihá eambbo seagáš go dat mii bohtá ovdan Sámedikki dieđáhusas. Dađi bahábut de dieđáhus ii čilge ii kulturguovddážiid servvodatrolla iige museaid servvodatrolla. Kulturguovddážat eai geavat áiggiset doajáldatáiggi ráddjemii, áibmoráddjemii, hástalusaide mat leat

divrriiguin, sámi vai oarjemáilmmi teknologiijai ja árktalaš fauna metodihkkii – rievdá go min oktasaš kulturárbi dálkkádatrievdamiid geažil, sáhtá go min árbevirolaš máhttu heaitit doaimmamis go dálkkádat rievdá, ođđa divrrit ja šattut ihtet go dálkkádat lieggana? Da leat viisot oassin museaid hástaleaddji árgabeaivvis.

### Museaid erenoamáš servvodatrolla

Fágalaččat ii leat dohkálaš defineret kulturguovddážiid musean, ja diekkár politihka boađus sáhtá leat oba duođalaš boahttevaš buolvvaide.

Min geatnegasvuohta lea hálddašit dan árbbi maid mii leat ožžon, dálá áiggi gelbbolašvuođain, boahttevaš buolvvaide bealis. Ii leat jierpmálaš vuoruhit ruđaid dušše dan mielde mii dálá áiggi lea, iige geahččat dan ahte mii fertet hálddašit ja áimmahuššat kulturárbbi vai dat lea áimmuin boahtteáiggi. Internašunaliseremiin ja sámi servvodaga ealáhusvuođu jođánis rievdamiin, de unnu ahte unnu sámi vugiid ja tehnikaid geavaheapmi. Dás čuvvot maid sámit ja dajaldagat mat eai leat šat geavahusas. Jus ii dáid ge vurkkot museain, de eai boahttevaš buolvvat ge sáhte revitaliseret dan maid dálá sápmelaččat eai fievrrit viidáseappot. Dán oktavuodas lea museain áibbas erenoamáš rolla sámi servvodagas.

Sámediggi, dainna vuđolaš ipmárdusain das mii musea lea, ferte bidjat fuomášumi ja deattuhit dan erenoamáš museala servvodatrolla, eaige doaimmaid mat leat kulturguovddážiin ja kulturviesuin. Kultuvrralaš servvodatoaimmat gal dieđusge leat dehálaččat servvodateallimii, muhto doppe leat ollu eará servvodataktevrrat geat “dálá” sápmelaččaid ja sin kultuvrralaš ovdanbuktimiid fuolahit – festiválat, guovddážit, kreatiiva ealáhusat ja nu ain. Dat leat beare museat mat leat museat.

### Eará

Olbmuid bázahasat: Mii eat liiko vuostáiváldit dákerikkiid museaide. Dán berrešii čilget sámi etihkain ja kulturárbbi áddejumiin. Eat mii sáhte min iežamet máttuid bázahasaiguin meannudit seamma ládje go majoritehtamuseat leat čuđiid jagiid dahkan. Eat mii sáhte joatkit dien koloniserejeaddji doaimma. Baicce berrešimmet árvvoštallat hávdádit sin.

ICOM museaehtalaš njuolggadusat, mat leat museafágalaš hálddašeami vuodđoáššiid searvvis, eai oba namuhuvvoge goalmát kapihtalis. Sámi museat leat maid ieža 2011:s ráhkadan sámi museaide čoakkáldathálddašeami njuolggadusaid (Sámi museafierpmádat).

Go UNESCO namuhuvvo, de berrešii maid boahit ovdan ahte RDM lea leamašan fárus ráhkadeame ohcamuša mainna davviriikalaš “klinke” fanasárbevierru nominerejuvvui UNESCO máilmmiárbelistui.

Lea dehálaš ahte sámi ovdasteaddjit válljejuvvojit nationála lávdegottiide vai sámi perspektiiva ja searvan lea sihkkaraston.

Sámediggedieđáhus berrešii leat čielggas ja eambo konkrehta dalle go dieđáhusas namuhuvvojit ovdamearkkat. Ovdamearkka dihte siiddus 16 – Gii dat lea gii dárbaša lasihit iežas dutkangelbbolašvuođa ja mas? Guđet leat dat stuora dieđalaš museat?

3) Mearrádusárvalus:  
Gulaskuddancealkámuš dohkkehuvvo.

4) Mearrádus:

**Ášši 16-2020**

**Davviguovlludiedáhussii cealkámuš**

1) Áššebáhpirat:

- Oanehaš veršuvdna dain báhpiriin mat geigejuvvojit
- Guhkit dokumeantta rievdaduvvon veršuvdna

2) Áššečilgehus:

RDM stivrajođiheaddji ja direktvra leaba ovttasbargan Davvi-Norgga dáiddamusea stivrajođiheddjiin Grete Ellingseniin ja Cathrine Steeniin, Office for Contemporary Art Norway direktvrrain Katya Garcia-Antóniiniin ja Artica Svalbard/Svalbard museum Tora Hultgreeniiniin. Ovttasbarggu boadus lea oktasaš cealkámuš Davviguovlludiedáhussii. Stivrajođiheaddji Johan Vasara lea doaibman RDM gulahallanolmmožin dán barggus. Christin Kristoffersen lea bálkáhuvvon konsuleantan ja koordináhtorin.

Oktasaš cealkámuša ovttasbarggu duogáš lea:

“Davviguovlludiedáhusa proseassaáigodat lea čájehan ahte lea stuora dárbu sihkarastit ahte ártkalaš/davviguovlluperspektiiva dáidda ja kultuvra fáddái namuhuvvo dieđáhusas/lea dieđáhusa oassin. Lea dehálaš ahte servvodatguoddit, dáidda ja kultuvra, leat fárus buktime kultuvrralaš ja servvodatperspektiiva davviguovllu ovddideapmái, mii lea hui dehálaš guovlu nátionála ja geopolitihkalaš boahhteáigái. Davviguovlu ja ártkalaš guovlu leat servvodagat ja guovllut gos orrot álbmogat ja álgoálbmogat geain leat sierra iešvuođat, iežaset kultuvrrat ja iežaset narratiivvat, ja lea duođalaš ahte sii eai beasa leat fárus váikkuheamis dan politihkalaš dáhttui ja dasa movt sin iežaset guovlu ipmirduvvo. Sis eai ge oáččo dan vuoigatvuođalaš saji mii sis galggašii leat Norgga našuvnna davviguovlluperspektiivva narratiivvas, ja Ártkalaš guovllu internationála ipmárdusas. *Norgga ráđđehus galggašii leat ovdavázzin ja loktet goappašat dáid áššiid. Sii fertejit davviguovlluid/Árttisa dáidda- ja kultuvra-perspektiivva áššiid ovddidišgoahtit ja nannet barggu sihke nátionála ja internationála dásis. Álggaheaddjit háliidit leat fárus dagaheame ahte dát duođai lea loktejuvvon sihke proseassa áiggi ja maiddá maŋŋá ráđđehusa davviguovlludiedáhusa.*”

Geassemánu 25. beaivvi vuostáiváldá kulturministtar Abid Raja davviguovlludiedáhussii cealkámuša, Oslos diibmu 14.

Doppe lea RDM bealis stivrajođiheaddji Johan Vasara.

3) Mearrádusárvalus:

Stivra doarju cealkámuša Davviguovlludiedáhussii.

4) Mearrádus:

*Ovttajienalaččat*

**Ášši 17-2020**

**RDM njoammuneastadanplána**

1) Áššebáhpirat:

- RDM njoammuneastadanplána

- <https://museumsforbundet.no/nyheter/rad-til-medlemsinstitusjonene-nar-det-gjelder-koronaviruset/>

2) Áššečilgehus:

RDM lea *Norgga Museasearvvi* (Norges Museumsforbund) museaid njoammuneastadanbagadusa geavahan álgovuodđun. Dát lea dušše dárogillii.

Geassemánu 16. beaivvi 2020 mii rahpat RDM museaid dábálaš doaimma nu ollu go lea vejolaš. RDM:i lea deháleamos ahte coronavirus ii njoamo gussiide iige bargiide, ja danne bargat mii buot maid sáhttit eastadan dihte njoammuma. Lea museaid iežaset ovddasvástádus bearráigeahččat ahte doaibma čuovvu gustojeaddji lágaid ja njuolggadusaid, ja dainna njoammuneastadeami plánain mii váldit vuhtii doaibmi njuolggadusaid. Juohke báikkálaš musea ja dáiddamagasiidna lea dahkan sierra risikoárvoštallama mii lea vuodđun báikkálaš njoammuneastadeaddji barggus.

Hálddahus berre rievdadit njoammuneastadanplána dađistaga go nátionála rávvagat ain bohtet eisseválddiin ja museasearvvis.

3) Mearrádusárvalus:

RDM njoammuneastadanplána dohkkehuvo.

4) Mearrádus:

*Ovttajienalaččat*

#### 4. DIGAŠTALLANÁŠŠIT

Eai leat áššit

#### 5. ČOAHKKÁIGEASSU

##### 18 - 2020 Muđui

- Boahtte stivračoahkkin: Direktivra sádde e-poasta go Hámmárfeastta gieldda lea vástidan mañemus jearaldahkii.
- Guovdageainnu gilišilljui oastit skohtera. Direktivra sádde e-poastaášši meannudeapmái. 29.06.20 dorjo 7 stivraláhtu 8 stivraláhtus čuovvovaš mearrádusa: RDM stivra doarju gitta r.59 000 rádjái oastit skohtera Guovdageainnu gilišilljui. Ruhtá sirdojuvvo stivrra bargguid- ja bargiidčoahkkin boasttain rehketoalus. Čakčamánu meannuda stivra reviderejuvvon budjeahtta.

Moai duodaštetne ahte referáhtta lea riehta:

---

Ann-Britt Eira Sara  
Stivramiellahttu

---

Ellen Bals  
Stivramiellahttu